



Zatraženo pritvaranje uhapšenih u akciji SIPA-e

Fetić od djevojaka

uzimao dio zarade

Čeho i Koledin lažnim prikazivanjem činjenica te instaliranjem posebnog softvera omogućavali utaju poreza. Fetić povezivao djevojke sa klijentima koji su tražili seksualne usluge

Tužilaštvo Kantona Sarajevo zatražilo je određivanje jednomjesečnog pritvora za Nermana Čehu (34), Dragana Koledina (67) i Seida Fetića (24), uhapšenih u nastavku akcija „Coral“ i „Tango“ koju su na području Sarajeva u ponedjeljak proveli pripadnici SIPA-e. Tužilaštvo smatra da bi osumnjičeni boravkom na slobodi ometali tok istrage, utjecali na svjedoke te sakrili i uništili dokaze.

Organiziranje prostitucije

Kantonalna tužiteljica Jasmina Iftić na ročištu za određivanje pritvora u sarajevskom Kantonalnom sudu kazala je da je Čeho kao ovlaštenu knjigovođu agencije lažnim prikazivanjem činjenica i podataka doprinio izvršenju krivičnog djela porezne utaje, dok je Koledin osumnjičen da je instaliranjem softverskog programa omogućio poreznu utaju.

U prijedlogu za određivanje mjere pritvora, Iftić je naglasila da su Čeho i Koledin, na čelu sa Alenom Čengićem i Muhamedom Puškićem, počinili krivično djelo porezna utaja pružajući knjigovodstvene i informatičke usluge privrednom društvu „Holiday Resort d.o.o. Sarajevo“, kojim je budžet Federacije BiH oštećen za preko pola miliona maraka.

Tužiteljica je navela da se Fetić sumnjiči da je u periodu od jula do septembra prošle godine na području Kantona Sarajevo organizovao i vodio



Koledin (lijevo) prilikom privođenja u Kantonalno tužilaštvo u Sarajevu

pružanje seksualnih usluga. On je osumnjičen da je kontaktirao određene djevojke i korisnike njihovih usluga, te ih upućivao na adresu na kojoj su te usluge pružane, za šta su mu one davale dio novca od zarade. Sumnja se da su djevojke Fetiću plaćale iznose od 50 do 100 maraka.

Odrane osumnjičenih protivile su se prijedlogu Tužilaštva da se njihovim branjenicima odredi mjera pritvora. Advokat osumnjičenog Čeha, Asim Crnalić, kazao je kako je njegov branjenik u toku istrage, bez poziva Tužilaštva, Poreznoj upravi predao svu dokumentaciju koju je imao.

Protivljenje advokata

-To dokazuje da nije imao namjeru ometati tok krivičnog postupka i nije uradio ništa

čime bi se stekao dojam da bi utjecao na svjedoke – kazao je Crnalić, te dodao da je Čeho vlasnik agencije koja ima dogovorene brojne sastanke koje treba ispoštovati. Također, dodao je da od njegovog boravka na slobodi zavise isplate plaća uposlenicima knjigovodstvene agencije.

Mirsada Beganović-Žutić, koja brani osumnjičenog Fetića, kazala je kako je njen branjenik priznao izvršenje krivičnog djela, još tokom ispitivanja u prostorijama Državne agencije za istrage i zaštitu (SIPA).

-On je u potpunosti potvrdio navode istrage i svjestan je situacije u kojoj se našao. Fetić nije u kontaktu s osobama sa kojima je saradivao za vrijeme izvršenja krivičnog djela, tako da ne može utjecati na

svjedoke – kazala je Beganović-Žutić, a Sudu se obratio i osumnjičeni, koji je kazao kako se kaje, te da više neće činiti krivična djela.

Koledinova odbrana je istakla da je on bio vanjski saradnik te da je izradio i instalirao program koji je od njega naručen, te da nije znao u koje svrhe će biti korišten.

Akcije „Coral“ i „Tango“ započete su 8. oktobra 2015. godine kada su pretreseni objekti na deset lokacija na području Sarajeva i uhapšeno 15 osoba zbog sumnje za počinjeni organizirani kriminal u vezi sa poreznom utajom, ugrožavanjem sigurnosti, sprečavanjem službene osobe u vršenju službene radnje, oštećenje tuđe stvari, teškom krađom, organiziranjem otpora, te navođenjem na prostituciju.